

Ҳазрати Абу Бакр (21-қисм)

16:51 / 20.04.2017 4865

СОЛИҲ САЛАФЛАР ИБРАТИ

САҲОБАЛАР САЙЙИДИ

Абу Бакр Сиддиқ розияллоҳу анҳу ҳаётларидан лавҳалар

ҚУРЪОННИНГ ЖАМЛАНИШИ

(21-қисм)

Муртадларга, сохта пайғамбарларга қарши жангларга бош бўлган ҳазрат Абу Бакр Сиддиқ розияллоҳу анҳу ана шу тўқнашувларда мусулмонлардан жуда кўп кишининг ҳалок бўлганидан изтироб чекиб, жавобгарликдан қийналиб юрган кунларда ҳазрат Умар яна бир кўнгилсиз воқеага у кишининг эътиборларини қаратдилар. Мусайламатул- Каззоб қўшинига қарши муҳорабада мусулмонлар ичидан жуда кўп Қуръон ҳофизлари, қорилар шаҳид бўлишди. Баъзи ривоятларга кўра, беш юз, бошқасига биноан, етти юз ҳофизул-Қуръон жанг майдонида ҳалок бўлган эди. Бу воқеадан ҳазрат Умар даҳшатга тушдилар: «Қуръонни ёд билган қорилар шу тахлитда ўлиб кетишаверса, кейинчалик Каломуллоҳнинг оятлари нутилиб кетмайдими? »

Умар ибн Хаттоб розияллоҳу анҳу ҳаяжон ва қўрқув ичра халифа Абу Бакр Сиддиқ розияллоҳу анҳу ҳузурларига чопдилар. Халифа ҳам Ямомада кўплаб қориларнинг шаҳид бўлганини эшитиб мотам-қайғуда ўтирган эканлар. Ҳазрат Умар у кишига маслаҳат бердилар:

— Ямомада Қуръон қориларининг кўпчилиги шаҳид бўлганини эшитдингиз. Агар ҳол шу тарзда давом этаверса, Қуръонга зиён етадими, деб қўрқяпман. Менинг раъйим шуки, Қуръонни жам қилишга буюрсангиз.

— Расулulloҳ соллalloҳу алайҳи васаллам қилмаган ишни биз қандай қиламиз? – дедилар ҳазрат Абу Бакр.

— Аллоҳга қасамки, бу хайрли ишдир, – дедилар Умар ибн Хаттоб.

Ҳазрат Абу Бакр тараддудланиб қолдилар. Дўстлари – Сарвари коинот соллalloҳу алайҳи васаллам қўл урмаган ишга кўнгиллари чопмасди.

Ҳазрат Умар эса таклифларини қайта-қайта айтишдан чарчамасдилар. Ниҳоят Аллоҳ таоло ҳазрат Абу Бакрнинг дилларида Қуръонни жамлашга рағбат уйғотди. «Умар тўғри айтади, Каломуллоҳни жамлаш зарур», деган тўхтама келдилар. Кейин Расулulloҳ соллalloҳу алайҳи васалламнинг ваҳий котиблари Зайд ибн Собитни топтириб келдилар. У кишига ниятларини изҳор қилдилар:

— Менга қаранг, Зайд, сиз оқил, ёш йигитсиз. Сизнинг ҳақингизда ҳеч қандай шубҳага бормаимиз. Сиз Аллоҳнинг расулига тушган ваҳийни ёзиб борар эдингиз. Энди Қуръонни жамлашга киришинг!

Зайд ибн Собит розияллоҳу анҳу халифанинг бу амрларига унча рўйхушлик бермадилар. Бу иш ваҳий котибига оғир тоғни ўрnidан силжитишдан ҳам машаққатлироқ эди. Охири кўнгилларидаги шубҳа-истиҳола сабабини очдилар:

— Ахир Расулulloҳ соллalloҳу алайҳи васаллам қилмаган ишни сиз қандай қиласиз?

— Аллоҳга қасамки, бу хайрли ишдир, - дедилар ҳазрат Абу Бакр ҳам ҳазрат Умарнинг сўзларини такрорлаб.

Зайд тинчландилар. Халифа ҳам, ҳазрат Умар ҳам бу ишга рағбат кўрсатишибдими, бу киши ҳам майл изҳор қилишдан ўзга чора топмадилар. Халифанинг буйруқлари билан хурмо пўстлоқлари, ясси тошлар, тери каби ҳар хил нарсаларга ёзиб қўйилган Қуръон оятларини тўплай бошладилар. Бирор нарсага ёзилмай қолган оятларни жамлашда мазкур оят Қуръондан эканига ва қайси сурада жойлашишига икки киши гувоҳлик берганидан кейингина алоҳида саҳифага ёзишга келишиб олдилар. Агар икки гувоҳ топилмаса, мазкур оят ташлаб юборилган. Мана шунга кўра, ёзилмай қолган оятлар икки қори гувоҳлик берганидан сўнг уларнинг кўрсатмаси инобатга олингангина, Қуръон саҳифасига ёзиб қўшиб қўйилган. Оғзаки эшитилган оятнинг қайси сурадан эканлигига саҳобалардан икки киши гувоҳлик беролмаган тақдирда уни ҳам Қуръонга қўшмай ташлаб юборилди. Мана шу тариқа Қуръонни жамловчилар ҳеч қандай ихтилофсиз уни охиригача жамлаб чиқишди.

Фақат икки оятда тортишиб қолишди. Тавба сурасининг «(Эй инсонлар), ахир сизларга ўзларингиздан бўлган, сизларнинг кулфат-машаққат чекишингиздан қийналгувчи... бир пайғамбар келди-ку!» деган охириги оятлари Абу Ҳузайматулдан топилди. Агар Абу Ҳузайматул ансорий

бўлмаганида ҳазрат Умар мазкур икки оятни хазф қилган бўлар эдилар. Чунки Расулуллоҳ соллаллоҳу алайҳи васаллам Ҳузайматул Ансорийнинг гувоҳликларини икки киши гувоҳлиги ўрнида қабул қилишга ишора этгандилар. Ҳузайманинг ўзлари ана шу икки оят ҳақиқатан ҳам Қуръондан эканлигига гувоҳлик берганларидан кейин гувоҳликлари икки киши гувоҳлиги баробарида ҳисобланиб, Қуръонга қўшиб қўйилди.

Қуръон саҳифалари жам қилингандан кейин дастлаб Абу Бакр Сиддиқда, у зотнинг вафотларидан кейин ҳазрат Умар да, сўнгра Умар ибн Хатгобнинг қизлари Ҳафса онамизда сақланди.

Шундай қилиб, Аллоҳ ҳазрат Абу Бакр воситаларида Қуръонни зиёндан асради. Қориларнинг ўлими туфайли Қуръон оятларининг баъзилари унутилиб, йўқолиб кетишининг олдини олди. Чунки баъзи оятларни ўша қорилардан бошқа ҳеч ким билмасди. Абу Бакр Сиддиқ розияллоҳу анҳунинг Қуръонни жамлашдаги рағбат ва саъй-ҳаракатлари Ислом уммати учун улуғ неъмат, катта тухфа бўлди. Бу хусусда Али ибн Абу Толиб каррамаллоҳу ваҳҳаҳу шундай деганлар: «Мусҳафлар йиғиш борасида одамларнинг ажр жихатидан насибадорроғи Абу Бакр Сиддиқ розияллоҳу анҳудир. Албатта Абу Бакр Қуръонни икки муқова орасига жамлаган энг аввалги кишилардандир».